

# Nopa Expa Amatljajcuiloli catli Juan Quiijcuilo

## Nochi camanaltique cuali tlen Gayo

**1** <sup>1</sup> Na ninopa huehue tlatatl nimitztljajcuilhuía, tinohuampox Gayo, catli nelía nimitzicnelía.

<sup>2</sup> Noicni catli nimitzicnelía, quema nimotlatlajtía, nijtlajtlanía Toteco para nochi ma yohui nelía cuali para ta ipan nochi tlamantli. Nijtlajtlanía Toteco para xiitzto cuali ipan motlacayo quen nojquiya moalma eltoc cuali iixpa. <sup>3</sup> Nelía nipajqui quema hualajque toicnihua huan techilhuijque quen tijtoquilía catli melahuac huan tijchihua catli xitlahuac. <sup>4</sup> Amo tleno huelis nechmacas más paquilistli, pampa miyac nipaqui quema nijcaqui para noconehua nemij ipan se ojtli catli xitlahuac.

## Gayo quinmocuitlahui tlamachtiani tlen icamanal Toteco

<sup>5</sup> Noicni Gayo catli nimitzicnelía, nelía tijchihua catli cuali quema tiquinselía huan tiquinpalehuía toicnihua catli tlamachtijtinemij, huan quema tiquinselía catli amo tlaiximatilme. <sup>6</sup> Inijuanti techyolmelahuacoj titlaneltocani nica ipan ni totiopa quenicatza titeicnelía. Cuali para tiquinpalehuis ipan iniojhui catli quitequipanohuaj Toteco, pampa ya nopa quinamiqui ma tijchihuaca ica catli quitequipanohuaj Toteco. <sup>7</sup> Pampa nopa tlamachtiani yohuij campa hueli pampa quicnelíaj Toteco. Huan amo tleno quiselíaj tlen sequinoc catli amo quineltocaj Toteco. <sup>8</sup> Huajca monequi tiquinpalehuise catli quitequipanohuaj Toteco para quej nopa inijuanti huan tojuanti san sejco tijchihuase para ma momoyahua catli melahuac.

## Amo cuali catli Diótreres quichijqui

<sup>9</sup> Niquijcuilo para xiteselica ipan seyoc amatljajcuiloli huan nijtitlanqui para nopa tiopamitl tlen tlaneltocani nepa. Pero Diótreres catli quipactía tlayacanas nopona, amo quiselía totequiticayo huan amo quichihuilía cuenta catli tiquijtohuaj. <sup>10</sup> Quema niajsiti nopona, nimechyolmelahuas catli fiero quichihua, huan quenicatza techelnamictinemi huan techistlachahuijtinemi. Huan amo paqui san para ya nopa quichihua, yaya nojquiya amo quinselía toicnihua catli tlamachtijtinemij icamanal Toteco. Huan quintzacuilía sequinoc catli quinequij quinselise, huan sintla acajya quinselía totlamachtijcahua, quintojtoca ipan tiopa.

<sup>11</sup> Noicni catli nimitzicnelía, amo xijtoquili se catli amo cuali. Xijtoquili catli cuali. Aqui quichihua catli cuali quinextía para yaya

iaxca Toteco, huan catli quichihuj catli amo cuali quinextíaj amo quiiximatij Toteco.

### **Demetrio cuali ojtli quihuicac**

<sup>12</sup>Nochi tlaneltocani camanaltij cuali tlen toicni Demetrio huan melahuac inincamanal. Tojuanti nojquiya timechyolmelahuaj para Demetrio quihuica se cuali ojtli huan anquimatij melahuac catli tiquijtohuaj.

### **Juan quinahuatijtejqui**

<sup>13</sup>Nijpixqui miyac tlamantli catli nijnequiyaya nimitzilhuis, pero amo niqijcuilos nochi ipan ni amatl. <sup>14</sup>Pampa nijnequi niyas nepa achi nimantzi huan timoixtlachilijtose timocamanalhuise.

<sup>15</sup>Ma Toteco mitzmaca tlasehuilistli. Mitzontlajpalohuj mohuampoyohua nica. Techontlajpalhuili sesen tohuampoyohua catli itztoque nopona.